

35 ambassadurs a Trin

La GiuRu ospitescha actualmain il seminari internaziunal da la YEN

■ (anr/abc) Quest'emna è Trin in pitschen Brüssel. En la Casa Mesaglina ha lieu in congress internaziunal da giuventetgna. La GiuRu ha envidà al seminari da kickoff, en il center è la tematica «Minority Messengers». La YEN è quest'emna a Trin en l'albiert da giuventetgna Casa Mesaglina. 21 giuvnas e giuvens da 20 minoritads europeicas èn s'annunziads per il seminari da «kickoff» da l'onn 2018. Quai vul dir ch'i sa tracta da l'emprima da quatter scuntradas internaziunalas che la YEN organisescha per ses commembers. La YEN, quai è la scursanizium per «Youth of European Nationalities», per rumantsch èsi la «Giuventetgna da las gruppas etnicas da l'Europa» (GEE). A Trin sa scoleschan ils participants per cuntanscher il titel da «Minority Messengers». Mardi passà ha l'Agentura da novitads rumantscha visità il seminari che la GiuRu ha organisà.

Bleras amicizias tras ils inscuters
En tut consista la gruppa internaziunala ch'è quest'emna a Trin en la Casa Mesaglina da 35 persunas. Tranter quellas er il comité d'organisaziun da la GiuRu e commembers da la giunta da la YEN. Britta Tästensen, ina giuvna da 25 onns, presidescha actualmain la YEN. Ella è Danaisa e fa part d'ina minoritad tudestga da 15 000 Nordschleswiger che vivan en il sid da la Danimarca. Grazia a las activitads da la YEN saja ella stada gia en diversas regiuns da l'Europa ed haja emprendì a conoscher blera glieud. L'onn passà èn ils seminaris stads a Trieste tar ils Slovans en l'Italia, alur èn ils giuvens stads en l'Albania tar ils Aromuns, a Danzig han ils participants d'in seminari emprendì a conoscher la minoritad dals Kaschuks. Il quart seminari da l'onn passà è stà ina girada cun in bus atras l'Europa. «Durant ils ogt dis dal viadi avain nus visità diesch gruppas etnicas», di Tästensen. Ella renda attent al fatg che mintga settavel abitant da l'Europa tutgia tar ina minoritad (guarda era box). L'onn da lavur da la YEN per il 2018 ha cumenzà dumengia saira tar ils Rumantschs. Maurus Bundi da Sagogn, suprastant da la GiuRu, ha dà l'impuls che



Maurus Bundi, suprastant da la GiuRu (a sanestra), dasper el Britta Tästensen, la presidenta da la YEN. Dretg ils consporsabels per il seminari a Trin Angelica Augustin, Leander Albin e Giuanna Beeli.

FOTO A. BEELI

la YEN è vegnida en Svizra per il seminari da kickoff. Il giuvan da 25 onns è fieu e flomma per ils inscuters internaziunals. «Da quels inscuters èn naschidas bleras amicizias», raquinta el e respunda la dumonda daco che la YEN saja gist vegnida a Trin. «Ensemen cun noss president da la GiuRu, Wolf Candrian, essan nus s'annunziads spontanamain per questa emprima scuntrada dal 2018.» Ils buns contacts cun la nova Casa Mesaglina a Trin, l'albiert da giuventetgna ch'è s'avert il december passà, han levgià da chattar la basa ed ils dormitoris per tuts participants.

Aromuns, Kaschuks, Nordschleswigs...

«Il linguatg ha ina rolla extrem impurtanta per minoritads e gruppas etnicas, pertge ella ha la funcziun da crear l'identitad» pon ins leger insanua en la pagina d'internet da la YEN. A quella filosofia ed a quest motto è deditgada tutta lavur

da l'organisaziun internaziunala. Cun dinamica e cumpetenza s'engascha ella per ils dretgs e promova la segirezza da sazez da cumanzas etnicas. La giuventetgna è il futur. En quest senn èsi impressiuant da sentir e vesair cun tge luschezza che Sudets, Bretons, Tudestgs en l'Ucraina, Croats en l'Ungaria, Macedons, Aromans, Sorbs, Thraks e blers auters represchentan lur pievel minoritar. Ils commembers da la GiuRu represchentan la Rumantschia entaifer questa babilonia e maschaida d'etnias. Maurus Bundi conferma che tut giaja patgific e senza problems per englais u tudestg. Sco avant 2000 onns en l'imperi roman, cura ch'il latin colliava ils pievels, èsi oz l'englais.

A Trin n'è quai betg auter, pertge durant ils workshops discurren tuts il linguatg mundial. I va per retorica, contacts e comunicaziun. En il center dal seminari da kickoff è la scolaziun per il titel da «Minority Messengers». Ils 21 participants ch'absolvan quest perfecziunament

ston esser in zic extrovertads, els ston savair ir encunter a glieud, esser diplomats, els ston persvader en il discurs, esser tant scharmants sco insistent. Finamira da la scolaziun èsi ch'els pon ir en l'avegnir tar autras minoritads per infurmar quellas dals dretgs, offrir sustegn ed infurmar ellas da la politica da linguatgs.

Ils commembers da la GiuRu ch'han organisà il seminari da kickoff dal 2018 han questa giada autras funcziuns. Els ston guardar ch'il program da l'emna constettia, ch'els participants sajan ad uras en il dretg lieu e ch'els sa sentian bain en Rumantschia. Bundi e ses collegas dal comité conferman ch'els sa sentian fitg bain en la Casa Mesaglina a Trin. La GiuRu haja gi cletg da pudair porscher quest alloschi. Ier ha la gruppa dal rest bandunà Trin. Ils giuvens e las giuvnas èn stads a Cuira nua ch'els han visità l'Institut dal DRG e la Chasa RTR. Sco quai ch'ina participanta ha ditg pon ils Rumantschs esser fitg loschs da quellas instituziuns.

337 minoritads, quatter linguas da tschep

La YEN n'è betg (mo) ina munaida d'in pajais da l'Orient lontan. Igl è la scursanizium englaisa da l'organisaziun internaziunala «Youth of European Nationalities». Per rumantsch èsi la «Giuventetgna da las gruppas etnicas da l'Europa» (GEE). I sa tracta d'ina organisaziun neutrala che represchenta ils interess ed ils dretgs da las gruppas etnicas istoricas da l'Europa. La GEE è ina rait dinamica d'organisaziuns da giuventetgna en ina Europa multiculturala e plurilingua. En tut ils 45 pajais che tutgan tar il continent datti 337 minoritads etnicas e naziunalas cun radund 100 milliuns commembers. Or da questa vista èn ils 60 000 Rumantschs ina da las minoritads pli pitschnas. Ils linguatgs ufficials da la GEE èn l'englais ed il tudestg. La pagina d'internet da l'organisaziun è www.yeni.org. Igl è ina plattform vasta da 337 minoritads. Da la YEN/GEE fan part 41 uniuns. Quellas derivan dal rest da sulettaimain quatter linguatgs da tschep da l'Europa, numnadamain tudestg, latin, slav e finno-ungarais. La YEN/GEE batta per ils dretgs e l'existenza dals linguatgs minoritars.

Quai che pertutga las emissiuns da radio ha ella ditg ch'i dettia en ses pajais mintga dumengia saira ina emissiun da set minutas en lur linguatg, dapli tolerechian ins betg, ha ella raquintà.

La sonda saira, ils 17 da favrer 2018 envida la GiuRu la populaziun da s'inscuntrar cun ils participants dal seminari internaziunal. A las 20.30 entschaiva la saira en la sala da la Mesaglina cun in concert da gruppas rumantschas. Cun il titel «GiuRu-Sound» sa preschentan la musicista Paula Cadonau, il duo Leander Albin & Asa S. Hendry cun musica e poesia sco er il chantautor Mattiu Defuns. La GiuRu avess plaschair sche blers indigens vegnissan a questa scuntrada en la Casa Mesaglina.

Cun mascot, tastga e magazin

L'Uniun da commerci e professiun Mustér ha lantschau pliras accziuns da propaganda

DA HANS HUONDER / ANR

■ «Nus lein mussar a nos hosps da vacanzas, mo era als indigens tgei che nus purschin», di il president dall'Uniun da commerci e professiun Mustér, Edgar Durschei. Per propagar la purschida dallas commembras e dils commembers ha l'uniun ediu in magazin. In mascot en fuorma d'ina vacca ed ina tastga ein dus ulteriurs mieds che duein far enconuschents il commerci da Mustér. L'Uniun da commerci e professiun Mustér (UCP) ei vegnida fundada igl onn 1984. Gia dus onns pli tard ha ella organisau l'emprema gada l'EX ed uonn ha quella liug per in'ulteriura gada dils 26 entochen ils 28 d'october. L'exposiziun da commerci e professiun porscha allas fatschentas la caschun da seppresentar ad in pli vast publicum el Center da sport e cultura. Ils organisaturs spetgan rodund 90 exposituras ed expositurs e pli u meins 10 000 visitadras e visitaders. Danovamein vegn purschiu in program da rama. Dapi sia fundaziun ha l'UCP denton era arranschau repetidamein occurrenzas internas ni caschuns da perfecziun. Ella ei denton era s'engaschada politicamein, fagend paleis sia tenuta tier votaziuns ni era proponend candidatas e

candidats per elecziuns. Cun excepziun dall'organisaziun dall'EX ei l'activitad tschessada ils davos onns. Cun novs suprastants ei denton vegniu niev slontsch igl onn vargau enteifer las retschas dall'UCP. Quella dumbra il mument rodund 80 commembras e commembers da Mustér e vischnauncas vischinontas.

Niev slontsch

Igl onn vargau ha la suprastanza dall'Uniun da commerci e professiun Mustér fatg ponderaziuns co la purschida dallas commembras e dils commembers savess vegnir propagada meglier. Treis projects ein allura vegni realisai dapi lu: Ina tastga da pupi per las cumpras dil mintgadi, in mascot en fuorma d'ina vacca sco souvenir da Mustér ed in magazin. Quel vegn repartiur als proxims dis en tuttas casas da Mustér, inclusiv las habitaziuns secundaras. Il magazin cuntegn aschidadir duas cumponentas. D'ina vart ei quei las reclamas dallas fatschentas, dall'otra vart ina part redacziunala. Quella informescha jester e dumiester davart Mustér. Igl ei aschidadir in pign schatg davart la structura dalla vischnaunca, mo lu era entgina purschida sil sector cultural e dalla formaziun. Denter auter cuntegn el era in pign glossari cun plaidis dil min-

tgadi per tudestg, respectivamein romantsch. El magazin s'expriman era ils possessurs da secundas habitaziuns. Il magazin duei far attents il lectur sin la

purschida e sin la muntada dil commerci e da mintga singul plaz da lavur colligiau cun quel ella regiun. La finamira ei d'edir quei magazin era ils proxims onns,



Edgar Durschei ha surpriu il presidi dall'Uniun da commerci e professiun Mustér la primavera vargada. Avon era l'uniun stada in onn senza president.

FOTO H. HUONDER

mintgaga cun in auter cuntegn redacziunala. Aschuntada al magazin che vegn repartiur ellas scaffas da brevs ei ina carta che legitimescha il possessur da retrer survetschs e rauba per in prezi reduciu tier pliras fatschentas. Quellas ein marca-das el magazin cun in punct tgietchen.

Engaschi continuau

«Nus stuein esser pertscharts ch'ei va buca bein cun tuttas interpresas a Mustér. Entginas survivan schizun mo ord idealissem. Per quei motiv eis ei impurtant ch'ellas sentien nies sustegn», di il president dall'UCP, Edgar Durschei. El constatescha ch'il commerci sbursescha mintg'onn ina summa da paga da rodund 30 milliuns francs. Buca cumpridas en quella summa ein las pagas dil maun public. «Sche nus lein mantener quella dinamica ed attractivitat da lavur drova ei vinavon grondas stentas», puntuescha Durschei. In auter problem che fatschenta il commerci ei la munconza da forzas da lavur qualificadas. Ei seigi fetg grev d'animar glieud cun buna qualificaziun da vegnir ellas regiuns da muntogna sco a Mustér: «Consequentamein stuein nus empuar da scolar sezs la glieud e da scaffir las premissas per che quella resta cheu era suenter igl emprendissadi.»